

Generi *Pycnoderes* Guér. statura similis, sed corpus latius ovale, pronoto basi longitudine distincte saltem paulo latiore, disco postico convexo sed ne minime quidem inflato praecipueque hemielytris nitidulis, embolio angusto, incrassato-reflexo distinctus; a genere *Neofurius* Dist. corpore brevior, capite a latere viso brevior, gula parum distinguenda, antennarum articulis duobus primis brevibus, callis pronoti minusculis, obliquis, latius distantibus, scutello punctulato, cuneo brevi, latitudine basali ad summum aequae longo divergens; a genere *Eurychilella* m. structura embolii hemielytrisque laevibus mox distinguendus.

Sixeonotus morio n. sp. Ovalis, cum antennis pedibusque niger, articulis duobus ultimis antennarum gracillimis, fuscis, tertio basin versus testaceo, ipso apice femorum, annulo anteapicali tibiaram, interdum obsoleto vel deficiente, articulisque tarsorum basalibus sordide albidis; hemielytris opacis, fusco-nigris; vertice interdum utrinque ad oculum anguste testaceo; capite verticali, basi pronoti vix magis quam dimidio angustiore, ab antico viso latitudini basali cum oculis fere aequae longo, a latere viso brevi, clypeo verticali, angulo faciali recto; fronte foveola mediana oblonga notata; articulo secundo antennarum margini verticis interoculari vix aequae longo; pronoto pone callos minutos tumido-convexo, crebre et profunde punctato, punctis admodum magnis, circiter tertia basali parte disci subhorizontali, aequali, solum ad latera obsolete impressa; scutello distincto, pronoto plusquam $\frac{2}{3}$ brevior. Long. $2\frac{2}{5}$, lat. $1\frac{1}{3}$ mm.

Mexico, 3 sp.

Sixeonotus moestus n. sp. Late ovalis, niger, sat nitidus, antennis pallide flaventibus, articulo primo basi vel toto nigro, secundo margini verticis interoculari aequae longo, tertio apicem versus quartoque fuscescentibus; rostro pedibusque albidis, femoribus posticis ante apicem late nigris, extremo apice tibiaram articuloque ultimo tarsorum nigro-fuscis; capite verticali, basi pronoti circiter $\frac{3}{5}$ angustiore, ab antico viso latitudine cum oculis aequae longo, a latere viso brevi, clypeo verticali, angulo faciali recto; vertice marginibus ad oculos angustissime obscure testaceis, fronte foveola basali instructa; pronoto cinereo-pilosulo, crebre punctato, pone callos minutos sat modice convexo, parte circiter tertia basali subhorizontali, transversim modice convexo, aequali, ante angulos utrinque levissime depresso, disco versus apicem depressiusculum sensim declivi; scutello pronoto circiter $\frac{2}{3}$ brevior; hemielytris fusco-nigris, leviter nitidulis, cuneo latitudine basali brevior, membrana cum areola sordida, dilute fumata, venis crassis nigro-fuscis. Long. $2\frac{1}{2}$, lat. $1\frac{1}{2}$ mm.

Mexico m. Julii, 2 sp.; Chapul tepek, 1 sp.

Sixeonotus rubellus n. sp. Rufescenti-testaceus, sat nitidus, pectore abdomineque fuscescentibus; articulo primo antennarum, pedibus cum coxis, margine exteriori embolii cuneoque pallide flaventibus, oculis articuloque secundo antennarum (ultimi desunt) nigris, hoc margini interoculari verticis aequae longo; capite verticali; basi pronoti fere paulo magis quam dimidio angustiore, ab antico viso latitudini cum oculis aequae longo, a latere viso brevi, clypeo verticali, angulo faciali recto; clypeo fuscescente, fronte foveola basali destituta, basi convexa; pronoto crebre sat subtiliter impresso-punctato, disco postico sat leviter convexo, apicem versus leviter declivi, ad angulos posticos levissime depresso; lateribus late et profunde sinuatis, a medio versus basin fortius ampliatis; scutello pronoto dimidio brevior, basi medio leviter impresso; membrana sat pallida. ♀ Long. $2\frac{2}{5}$, lat. hemielytrorum $1\frac{2}{5}$ mm.

Mexico, 1 ♀.

Species lateribus pronoti fortius sinuatis insignis.